

दिनांक 16.12.2025
समय: 18.45 बजे
आकाशवाणी जयपुर-अजमेर

समाचार

- राज्य मांय आज वोटर लिस्टां रो मजमून जारी करी ज्यो ।
- मुख्यमंत्री भजनलाल शर्मा बीकानेर रा लूणकरणसर मांय 700 करोड़ रुप्या ऊं बत्ता खर्च री न्यारी-न्यारी परियोजनावां रा पूरा व्ह्या काम जनता ने संप्या अर नुवा कामां री सरुआत कीनी ।
- लोकसभा मांय विकसित भारत-रोजगार अर आजीविका मिशन ग्रामीण विधेयक 2025 पेश- मजुरां सारु साल मांय सवा सौ दिन रा काम रो प्रावधान ।

अर

- ईलाज रा देशी तरीका रा बारा मांय विश्व स्वास्थ्य संगठन री ओर ऊं दूजो विश्व सम्मेलन काल नई दिल्ली मांय सरु व्हेला ।

000

राज्य मांय वोटर लिस्टां रा विशेष गहन पुनरीक्षण कार्यक्रम रा तैत लिस्टां रो पहलो मजमून आज जारी कर दियो ज्यो । मजमून मांय वोट देवण लायक 5 करोड़ 46 लाख लोगां मांय ऊं करीब 41 लाख 85 हजार नाम हटायी ज्या है । राज्य रा मुख्य निर्वाचन अधिकारी नवीन महाजन आ जाणकारी दीनी । वे आकाशवाणी ने बतायो के खास तौर ऊं दो ठोड़ां नाम व्हेवण अर घरां नी मिलण सरीखा कारण है । वे बतायो के काटी ज्या नाम सी.ई.ओ. अर जिला निर्वाचन अधिकारियां री वेबसाइट माथे देख्या जा सके है । वोट देवण रा हकदार लोग आपत्तियां ई दर्ज करा सके है । श्री महाजन बतायो के दावा अर आपत्तियां रा निपटारा पाछे आखिरी तौर ऊं वोटर लिस्टां 14 फरवरी ने छापी जावेला ।

.....

000

मुख्यमंत्री भजनलाल शर्मा आज बीकानेर जिला रा लूणकरणसर मांय 107 करोड़ रुप्या रा खर्च ऊं पूरी व्ही 21 परियोजनावां जनता ने संपी । ई सागे ई वे करीब छह सौ करोड़ रुप्या रा खर्च वाळी परियोजनावां रा काम री सरुआत ई कीनी । ई मौके जनता ने संबोधित करता थकां मुख्यमंत्री कह्यो के लारला दो साल मांय वां रो खास ध्यान जनता री जिन्दगी आसान अर खुशहाल बणावण माथे रह्यो । श्री शर्मा कह्यो के लारला दो साल मांय सुशासन अर गरीबां रा कल्याण सारु ऐतिहासिक काम करी ज्या । मुख्यमंत्री कह्यो के सुशासन अर जन कल्याण सागे विकसित अर समृद्ध राजस्थान बणावण माथे वां री सरकार

खास ध्यान दे रही है। वे चुनाव के दौरान भारतीय जनता पार्टी की ओर रुं जारी करी ज्या घोषणा पत्र रो जिकर करता थकां कह्यो के जनता ने कामकाज की सालाना रपट पेश करण रो वायदो करी ज्यो हो, वां ने पूरी ईमानदारी रुं निभायो जा रह्यो है।

000

राज्य मांय मौजूदा सरकार रा दो साल पूरा व्हेवण रा सिलसिला मांय आज ई ज़िलां मांय भांत-भांत रा कार्यक्रम राख्यी ज्या अर प्रदर्शनियां लगायी ज्या। भीलवाड़ा मांय ज़िला प्रशासन अर सूचना विभाग की ओर रुं नगर निगम टाउनहॉल मांय तीन दिन की प्रदर्शनी सरू करीजी। विधायक अशोक कोठारी अर ज़िला कलेक्टर जसमीत सिंह संधू इण रो उद्घाटन कीनो।

ई प्रदर्शनी रो मकसद जनता रा भला की योजनावां अर विकास रा कामां की जाणकारी जनता तांई पूगावणो है। डीग ज़िला मांय ई ऐड़ी प्रदर्शनी लगायी ज्यी, जठे ज़िला विकास पुस्तिका रो विमोचन ई करी ज्यो। बारां मांय लगायी ज्यी प्रदर्शनी रो उद्घाटन करता थकां विधायक ललित मीणा वां रा विधानसभा हलका मांय हासिल करी ज्यी उपलब्धियां की जाणकारी दीनी। वे बतायो के सूरज की रोशनी रुं बिजली बणावण, पाणत अर पीवण रो पाणी मुहैया करावण रा हलकां मांय काम अर आठ सौ करोड़ रुपया रा खर्च रुं एनीकट बणावण ने खास उपब्धियां बतायी। बाड़मेर मांय पशुपालन मंत्री जोराराम कुमावत ज़िला स्तर की विकास प्रदर्शनी रो उद्घाटन कीनो। हनुमानगढ़ मांय ई जिला स्तर की विकास प्रदर्शनी लगायी ज्यी।

000

प्रधानमंत्री नरेंद्र मोदी दो दिन रा सरकारी दौरा सरू आज अफ्रीकी देश इथियोपिया की राजधानी अदीस अबाबा पूग्या। साल 2011 पाछे भारत रा किंण ई प्रधानमंत्री रो ओ पहलो इथियोपिया दौरो है। प्रधानमंत्री मोदी रो वठे रा प्रधानमंत्री डॉक्टर अबी अहमद अली सागे दोन्यू देशां रा रिश्तां रा बारा मांय विगतवार चर्चा करण अर इथियोपिया की संसद ने संबोधित करण रो कार्यक्रम है। दोन्यू देशां बीचे खेती-बाड़ी, खनन, डिजिटल इंफ्रास्ट्रक्चर अर साइबर हिफाजत सरीखा मुद्दां माथे चर्चा व्हेवण रा आसार है। इण रुं पहली प्रधानमंत्री नरेंद्र मोदी अर जॉर्डन रा राजा अब्दुल्ला द्वितीय आज जॉर्डन की राजधानी अम्मान मांय राख्यी ज्यी भारत-जॉर्डन व्यापार मंच की मीटिंग ने संबोधित कीनी। ई मौके वे दोन्यू देशां बीचे माली मदद ने और बधावण की योजनावां रो मज़मून पेश कीनो। राजा शाह अब्दुल्ला व्यापार मंच ने खास हलकां मांय भागीदारी अर मिल र निवेश करण रा बारा मांय चर्चा रो मौको बतायो। वे प्रधानमंत्री मोदी रो स्वागत करता थकां चर्चा रे जॉर्डन अर भारत बीचे माली अर निवेश सहयोग मांय बधोतरी मांय मददगार व्हेवण रो भरोसो जतायो। प्रधानमंत्री मोदी भारत-जॉर्डन रिश्तां की अनूठी प्रकृति रो जिकर करता थकां कह्यो के दोन्यू देशां रा रिश्ता न्यारी भांत रा है, जठे ऐतिहासिक भरोसो अर भविष्य रा माली मौका एके सागे मिले है।

000

विकसित भारत-रोजगार और आजीविका मिशन (ग्रामीण) विधेयक 2025 आज लोकसभा मांय पेश करी ज्यो। ई बिल मांय हर साल सवा सौ दिन तांई काम-धंधो दिरावण रो प्रावधान करी ज्यो है। केंद्रीय कृषि मंत्री शिवराज सिंह चौहान ओ बिल पेश कीनो। ई मौके वे कह्यो के प्रधानमंत्री नरेन्द्र मोदी की अगुवाई मांय गरीबां रा भला सरू केई योजनावां लागू करीजी है। ओ बिल बीस साल जूना महात्मा गांधी राष्ट्रीय ग्रामीण रोजगार गारंटी

कानून, 2005—मनरेगा री ठौड़ लेवेला। ई रो मकसद साल 2047 ताई विकसित भारत बणावण री सोच रे मुजब गांवां रो पूरो विकास करणो है। ई सारू बिल मांय मजूरां ने बत्ता दिन ताई काम मुहैया करावण री गारंटी, बेहतर मजूरी अर हिफाजत देवण रो प्रावधान करी ज्यो है। मनरेगा रा तैत फिलहाल एक माली साल मांय 100 दिन रा काम री गारंटी दी जावे है। कांग्रेस, डीएमके अर टीएमसी समेत विपख री केई पार्टियां ई बिल री खिलाफत कीनी।

000

विश्व स्वास्थ्य संगठन—डब्ल्यूएचओ री ओर ऊं ईलाज रा देशी तरीका रा बारा मांय दूजो ग्लोबल समिट काल नई दिल्ली मांय सरू व्हेला। तीन दिन रा ई समिट रो खास मुद्दो है: **‘संतुलन बहाल करना: स्वास्थ्य और कल्याण का विज्ञान और अभ्यास’**। ई मौके लगाया जावण वाळा आयुष एक्सपो मांय भारत रा ईलाज रा तौर—तरीका आयुर्वेद, योग, यूनानी, सिद्ध, सोवा—रिग्पा अर होम्योपैथी रा बारा मांय खास जाणकारी दी जावेला। ई सागे ई दवाई रा गुणां वाळा पौधां अर मसालां रा बारा मांय ई खास पवेलियन बणायो जावेला, जिण मांय चालीस औषधीय गुणां रा पौधां अर कम मिलण वाळा बीजां रो दरसाव कर्यो जावेला।

000

अजमेर रा राजकीय जवाहरलाल नेहरू अस्पताल मांय इमरजेंसी कने ही सर्जरी अर मेडिसिन यूनिट री ओपीडी सेवा सरू व्हे गयी है। अस्पताल रा अधीक्षक डॉ. अरविंद खरे बतायो के मरीजां रा सुबीता सारू अ ओपीडी सेवावां संवारे 9 ऊं रात 9 बज्यां ताई मुहैया करायी जावेला।

000

साल 1971 मांय पाकिस्तान रे खिलाफ व्ही लड़ाई मांय भारत री जीत री याद मांय देश आज विजय दिवस मना रह्यो है। राष्ट्रपति द्रौपदी मुर्मू, उपराष्ट्रपति सी पी राधाकृष्णन, प्रधानमंत्री नरेन्द्र मोदी, गृह मंत्री अमित शाह अर रक्षा मंत्री राजनाथ सिंह वां बहादुर फौजियां ने सिरधाभाव सागे याद कीना, ज्यां री हिम्मत अर बलिदान रे पाण भारत ने जीत हासिल व्ही। ई मौके राज्य मांय ई न्यारी—न्यारी ठौड़ां खास कार्यक्रम राखी ज्यो। ई लड़ाई मांय देश सारू जान निछावर करण वाळा बहादुर फौजियां ने भरतपुर मांय किला रा शहीद स्मारक माथे राखी ज्यो कार्यक्रम मांय सिरधाभाव सागे याद करी ज्यो। चित्तौड़गढ़ री सैनिक स्कूल मांय ई विजय दिवस रे मौके खास कार्यक्रम राखी ज्यो, जिण मांय शिक्षा मंत्री मदन दिलावर पैली वाळा फौजियां रो मान कीनो अर एयर राइफल शूटिंग अर तीरंदाजी रेंज जनता ने संपी। बाड़मेर मांय शहीद चौराहा माथे राखी ज्यो खास कार्यक्रम मांय गौरव सेनानियां, वीरांगनावां अर शहीदां रा पिरवार वाळां रो मान करी ज्यो। पाली जिला रा सोजत मांय पैली वाळा फौजियां रो मान करी ज्यो।

000